



**Fundasaun Mahein (FM), 23 Maiu 2019**

## **Komunikadu Imprensa**

### **Prosesu Akizisaun Kilat ba PSIK ho Regra ne'ebé Problematiku**

Orsamentu Jeral Estadu (OJE) 2019 ne'ebé aloka ba PSIK hamutuk US\$ 1,921,205.00. Normalmente orsamentu ne'ebé aloka hodi sosa ekipamentu ruma tama iha kategoria Kapital Menor. Nune'e orsamentu ne'ebé atu sosa ekipamentu seguransa hamutuk US\$ 100,000.00 husi total US\$ 263,000.00 kategoria Kapital Menor nian. Maibe la klaru atu sosa ekipamentu seguransa saida? Los duni iha âmbito seguransa nian despeza sira nune'e "sosa ekipamentu seguransa" identiku ho "segredu" katak sei sosa ekipamentu sira hanesan kilat, munisoens no ekipamentu sira seluk.

Ministru Justisa hasai tiha ona Diploma Ministerial ida iha tinan 2017 hodi aprova tipu kilat ne'ebé sei sosa ba pesoal PSIK. Ne'ebé antes ne'e pesoal PSIK sira hala'o ona treinamentu kona-bá tiru kilat no asaltu polisial nian iha Portugal. Maibe formasaun ne'ebé ho tempu badak los no foin ema na'in lima maka partisipa iha treinamentu ne'e.

Fundasaun Mahein (FM) nia observasaun identifika funsionariu ne'ebé daudaun ne'e existe iha PSIK hamutuk 119. Ho ida ne'e, kilat hira maka sei sosa ba PSIK? Timor-Leste iha lisaun barak kona-bá problema kilat, prosesu aprovizionamentu, utilizasaun no sistema kontrolu sira. Ezemplu kazu ne'ebé akontese iha tinan 2012 bainhira PNTL sosa kilat husi PT. Pindad Indonézia.

To'o agora la iha Lei propriu ruma hodi defini kona-bá kilat no prosesu akizisaun ba kilat sira ne'ebé atu sosa ba Institusaun sira Estadu nian. Nune'e Ministru Justisa halo desizaun liu husi deit Diploma Ministerial hodi sosa kilat ba PSIK no ho aprovasaun Konsellu Ministru nian.

#### **Rekomendasaun**

1. Rekomenda ba Governu presiza kria norma ka regulamentu propriu ruma hodi defini kona-bá prosesu akizisaun ba armas, munisoens no ekipamentu militar no seguransa nian.
2. Rekomenda ba Governu presiza hamosu ona Lei define kona-bá institusaun Estadu nian ida ne'ebé maka bele lori kilat.

Atu hetan informasaun kle'an liu kona-bá asuntu ne'e bele kontaktu:

### **João Almeida**

Acting Director

Email: [almeidamahein@gmail.com](mailto:almeidamahein@gmail.com)

Telemovel: (+670) 7756 1184

Website: [www.fundasaunmahein.org](http://www.fundasaunmahein.org)